

DEDICHE

VUCI DI CAMPAGNOLU

Cari amici l'accittati ?
Lu rigalu di stu cori ?
Cca lu tempu v'u passati
dunni l'occhiu sciala e gori;
na stu libru nun truvati
ne ricchizzi ne' trisori
« Ma l'aroma e lu sapuri
d'un pueta zappaturi ».

UN PROSITA MERITATU

Na stu gran libru fattu di Castighia
patrucinatu d'a Cassa Rurali,
truvati versi di gran meravighia
di stu gran pueta dialittali;
patri chi sustintau na famighia
cu' tant'amuri supranaturali,
e risulviu ogni parapigghia
cu' sensu veramenti eccezionali.
Ligghennu li so' versi ci truvati
tutta l'aroma e la genialità
cu' l'esperienza di tempi passati
duna cunsigli a la cristianità
« ancora vecchiu canta strati, strati
l'amuri, la saggizza e la buntà ».

TURI SUCAMELE

A LU ME' LIBRU

O libriceddu meu ciamma d'amuri
emblema di buntati e di virtù
di lu iardinu meu li megghiu ciuri
ntra li tò foggli mbalsamati sù;
pò quannu chi mi chiama lu Signuri
e na sta terra nun ci sugnu chiù;
tu libriceddu fammi lu favuri
li mè canzuni cantaccilli tù.

Vogghiu chi canti ntutti li cuntrati
senza chitarra e senza mariolu,
ntutti li chiazzi, ntutti li casati
n'ogni stratuni, trazzera o violu,
nmezzu li prufissura e littirati
porta la vuci di stu campagnolu
« chi cu lu scrusciu di li zappunati
li sò canzuni li nvintava a volu ».

Canta cu lu nostru dialettu
e sempri la parola libirtina
sia all'apperi, accavaddu o ncarrettu
di iornu, notti, di sira e matina,
presentacci l'ottava, lu sunettu
la vera *puisia* ginuina;
scippata di lu funnu di lu pettu
e nesci sempri bedda a vacca china.

Si qualchi onestu ti viri e t'agguanta
liggennu un sulu versu s'accuntenta;
si mpara na canzuna e poi la canta
nun si cinsura s'a cantalla stenta,
ma quannu c'è qualcunu chi si vanta
e com'un criticuni si presenta;
diccillu cu na lingua sciuta tanta
Pueta si ci nasci, un si diventa.

Ti raccumannu unn'haviri pritisi
na tutti li famigghi dunnì trasi
sia mpiati, mastranza o burgisi
cu Peppi, Cusumanu, Cicciu o Brasi,
a Dara, Tabaccaru, Ragattisi,
Kiggiari, Burrumia o li Fittasi;
mustrati sempri gentili e curtisi
cerca di fari a tutti pirsuasi.

26 NOVEMBRE 1911 - LA ME' NASCITA

Quannu penzu sta data mimurabili
parola d'omu diventu un cannibali,
fù tannu, chi mè Patri, omu affabili
essennu armatu, d'un'arma nfallibili
cu mè Matruzza fimminedda amabili
d'animu bonu, di Cori sinsibili;
'mriachi d'un'amuri insuperabili
cummisiru st'erruri incurriggibili.

Nun pussirennu mobili, nè stabili
mi misiru a stu Munnu incuncludibili,
e pircurrì na strada intranzitabili
appiccicannu mura, inaccissibili;
e senza scimitarri, spati e sciabuli
sfidavi li nnimici chiù tirribili; ¹
ma ora vecchiu munnu miserabili
puru na musca mi pari invincibili.

Lu ferru vecchiu si mpasta e rimpasta
si martiddia, si lima e novu resta,
ma l'omu vecchiu comu roba guasta
si scarta, si schifia comu la pesta;
comu na ciuri sicca nta na rasta
o un cocciu granu mortu ntra la nmesta;
frutta marciuta, ittata a catasta
chi sulu muschi e vermi fannu festa.

Però li sustintai deci pirsuni
senza scassari a nuddu magaseni,
e detti prova Munnu lazzaruni
com'è chi na famigghia si susteni,
cu picu, aratu, trappitu e zappuni
lastimi masticannu, stenti e peni;
ed'ora scavigghiatu nta na gnuni
anziusu aspettu chi la morti veni.

(1) I ntrallazzisti du piriudu da guerra (1939, 40, 41, 42 e macari u 43)
quannu un'omu facennu un gnornu ri metiri abbuscava 200 Liri e
na vastedda d'un chilu l'aiamu a pagari 170 e 175 liri, e na bona
parti di burgisi, chi ci sù ancora viventi chiacchiaranu.

LU LIBRU

Lu libru è na surgenti sana e pura
forsi la chiù lampanti chi ci sia,
purtari ti lu poi a villiggiatura
liggennulu lu Cori t'arricria,
si ci lu trovi nmanu a tò signura
nun'hai aviri nudda gelusia;
senza chi ti dumanna un cuntributu
e s'è sicuru ch'un ti fà curnutu.

Lu libru è l'amicu chiù fidatu
a cu lu leggi lu Cori ciàlleta
nta li sò fogghi ci trovi stampatu
lu Cori d'un grannissimu Pueta;
a tutti li Pueta ch'annu natu
ci fù assignata a tutti a stessa mèta;
pirchè un Pueta sulu pò nsignari
l'omu comu s'avissi a cumpurtari.

A tutti li Pueta chi ci sia
ch'esistinu na tuttu l'Universu
iò li descrivu tutti comu mia
l'esempiu lu pigghiu di mia stessu;
si viu a unu chi chiangi pi via
chingennu puru ci curru d'appressu;
*La musa ncori stampatu ni teni
sapiri sulamenti fari beni.*

LU CCHIU' FORTI

Na bedda vota lu sulì e lu ventu
essennu tutti dui sfacinnati
accuminciaru 'n'arrangiamentu
cuntannu ognunu li sò spaccunati.
Lu sulì dissi: « U cchiù forti mi sentu »
lu ventu ci rispu: « Un vi vantati »
(e misiru scummissa a manu a manu
cu si firava spugghiari un cristianu).

Lu primu fu lu ventu a cuminciari
puntannu a un viddaneddu chi spuntau,
comu dannatu si misi a ciuciari
ma lu viddanu cchiui si 'ncappucciau:
Miscinu nun si potti riparari
pirchè lu ventu si lu trasportau
lu fici terra terra ruzzuliari
ma mancu lu cappottu ci livau.

Dopo du ventu lu sulì pruvau
cu dda ducizza chi fa spasimari
araciu araciu li raggi 'nfucau
si 'ntisi lu viddanu suffucari
difatti lu cappottu si livau
c'un fazzulettu misi a frisculiari
e stancu addichinutu s'assittau
all'ummira d'un pignu a ripusari.

Si misiru di novu a raggiunari
lu sulì pritinnia la scummissa.
Lu Governu Talianu a lu passari
tinni l'aricchi a sentiri sta rissa
poi loccu loccu ci misi a 'ncugnari
e ci rispu: « La forza unn'è chissa.
Ca forza ch'aiu iò vi l'assicuru,
sugnu capaci di lassallu nuru ! »

PRIMAVERA DISPITTUSA

MEDAGLIA DI BRONZO

Un virdi mantu di biddizza rara
metti a la terra pi cummigghiatura
cu lu sò sciatu magicu pripara
na cappa nova ad'ogni pianta nura
pi mia sulu na pitanza amara
chi l'Anima e lu Cori m'addulura;
pirchè la mè surtazza tappinara
mi priva puru di sta cugnintura.

Quannu iò penzu lu mè tristi statu
ragiunu sulu comu scimunitu,
lu *pumu*, lu *cutugnu*, lu *ranatu*,
lu *piru*, lu *pircocu*, lu *vignitu*,
lu *persicu* di ciuri ammantidatu
pari *rignanti* vistutu di *zitu*;
e ghiò distinu vili e scilliratu
li stessi scarpi, lu stessu vistitu.

TRANQUILLITA'

M'assetu nterra pi quantu nun cascu
e m'accumentu di chiddu chi piscu,
ddi cosi puzzulenti nun l'annascu
nun mi ntricu pi Peppi o pi Franciscu
dunn'è chi nun mi pruri nun mi rascu
dunn'è ch'un mi nteressa nun mi nmiscu;
ma prifirisciu stringimi lu ciascu
sirutu sutta un'arvulu a lu friscu.

LA MATRI

MEDAGLIA DI BRONZO

Granni surgenti di ricchizzi assai
nqualunqui tempu trovi soccu voi,
funti d'amuri ch'un pirisci mai
tutti li peni li trasforma in gioi;
quannu p'un'ura luntanu ci stai
lu sò pinzeri fa li passi toi
nun timi affanni, ne peni, ne guai
la vita esponi pi li figghi soi.

Di li sò vini, lu sangu ci runa
cu lu sò pettu di scudu ci fà
cu la ducizza di li sò vasuna
porta la gioia e la tranquillità;
« surgenti di buntà, funti riccuna
d'affettu di virtù e sincirità ».

15 Ottobre 1957, ACCADEMIA GIOVANNI MELI (Palermo)

MALA FINI

O vecchiu zappuneddu rugginutu
sinceru amicu, cumpagnu fidatu
ci penzi qantu macchii emu strurutu ?
ci penzi quantu terra emu zappatu ?
iò sugnu iuntu vecchiu assaurrutu
però sì puru tu malu assurtatu;
a mia servi la fossa e lu tabbutu
a tia, foggia e marteddu e rimpastatu.

L'OMU

Si nasci un'incuscienti criatura
scanusci li carizzi e li palori
cu nmezzu la miseria chiù scura
cu nmezzu li ricchizzi e li trisori,
cu si suggetta all'asma o li dulura
cu soffri di coliti e cu di Cori
poi mentri inaspittata arriva l'ura
crepa, neucchia li peri, spira e mori.

NATALI

Sulenni festa, iurnata Divina
chi li campani sònanu a marteddu
ogni pirsuna nchiesa s'avvicina
e visita va fà a lu Bammineddu
qantu abbunanza c'è n'ogni cucina
sasizza, pulli e carni di viteddu;
ma la pignata mia sorti assassina
cucina gira, sinapi e qualeddu.

Festa pi tutti granni e picciriddi
di li chiù ricchi a li chiù puvireddi,
li ricchi cu pitanzi a middi, a middi
li scarsi mancu pani; figghiceddi;
CRISTU chi ncelu si nmezzu li stiddi
pire'un ti rapi li tò vavareddi
cunzola sti gintuzzi scarsuliddi
chi strazzanu lu Cori nuzzinteddi.

Ntra li campagni quantu picciriddi
nmezzu lu fangu comu carcaceddi
tutti cu li carnuzzi ngriddi ngriddi,
senza quasetti, senza scarpiceddi,
e nta la cera tutti giannuliddi
spruvvisti d'ogni cosa: figghiceddi;
li suli occhi, pi chiangiri a chiddi
chi cì lassaru ossa, carni e peddi.

O Patr'eternu gran pernu Supremu
nun semu puru nui, figghi d'Adamu ?
nun basta tuttu chiddu chi suffremu ?
e li suvirchiarì chi supputamu ?
fanni passari stu scantu c'havemu
a la vita nurmali riturnamu;
emu chiangiutu e ancora chiangemu
ma lassa mpaci a chiddi chi ristamu.